

欽
定
全
唐
文

欽定全唐文卷十六目錄

新文豐出版社藏書

中宗一

答邢文偉令

令官民投匭雪冤制

大赦雒州制

加相王實封制

加太平公主實封制

封壽昌縣主制

封永年縣主制

封仙源縣主制

贈徐有功越州都督制

封五王制

遣十使巡察風俗制

揀擇郡守制

拜南郊制

金城公主出降吐蕃制

答張說讓起復黃門侍郎制

贈拓拔思泰特進制

封長寧公主等制

長寧公主下嫁楊慎交制

相王及太平公主不得拜諸王公主制

加長寧安樂公主實封制

贈李昭德左御史大夫制

禁進獻奇巧制

授李承嘉戶部尚書制

授楊再思檢校左臺大夫制

授韋嗣立黃門侍郎制

授張錫工部尚書制

慮囚制

授蘇珣左臺大夫制

封張仁愿韓國公制

邵王贈皇太子制

集學生制

起復上官氏爲婕妤制

贈王遠知金紫光祿大夫詔

徵武攸緒詔

崇獎王友貞詔

東光縣主事跡編入國史詔

追贈楊初成官詔

令張柬之母辭封爵詔

貶敬暉等詔

賞郭山惲詔

褒天竺國使臣詔

勞契丹李失活詔

追奪劉光業等官爵詔

追復李勣官爵詔

欽定全唐文卷十六

中宗皇帝

帝諱顯高宗第七子顯慶元年生二年封周王儀鳳二年徙封英王改名哲永隆元年八月立爲皇太子宏道元年十二月即位嗣聖元年武后廢帝爲廬陵王房州安置聖歷元年復立爲皇太子仍名顯神龍元年正月復辟十一月上尊號應天皇帝三年八月加尊號應天神龍皇帝立二年被廢復位四年年五十五諡曰孝和皇帝廟號中宗追尊太和大聖大昭孝皇帝集四十卷

答邢文偉令

顧以虛庸早向墳典每欲研精政術極意書林但往在幼年未閑將衛竭誠耽誦因即損心比日以來風虛更積中奉恩旨不許重勞加以趨侍含元溫清朝夕承親無自專之道遵禮以色養爲先所以屢闕坐論時乖學緒公潛申雅勗式薦忠規敬尋來請良符宿志自非精思審諭義均弼諧豈能盡此藥言形於簡墨撫躬三省感愧兼深

令官民投匭雪冤制

門下九重嚴邃非閭閻之可聞萬邦遐曠因表䟽而方達

朕尊居黃屋心念蒼生微物不安每切納隍之慮一人失業更縈宵旰之懷思欲下情上通無令壅隔所以明四聰者也其官人百姓等有冤滯未申或獄訟失職或賢才不舉或進獻謀猷如此之流任其投匭凡百士庶宜識朕懷

大赦雒州制

朕聞唯天爲大所以上序三宗唯帝爲尊於是宏開七廟故知肇興衢室爰申宗祀之規爲建明堂或廣嚴禋之禮莫不八窻四達分氣候於炎涼複廟重簷定尊卑於昭穆實爲國之洪訓乃經邦之茂典我國家睿祖神宗重光累

業道軼羲農之上功侔造化之初冠今昔而居尊掩寰區
而作大朕承天撫運續聖開元披鳳歷而乘時握龍圖而
建極春秋變易每增霜露之心日月推移倍切蒸嘗之思
然而城臨丹鳳清廟久安水控元龜神基未立金輿往幸
空展望於瑤祠玉輦來巡實幸親於碣石三川帝里八水
皇州豈都邑之相誇而郊畿之有謝所以交風奧壤還開
候鴈之庭揆日明區更置馴龍之室巍巍紫座無虧薦鮪
之途奕奕彤宮遂得獻羔之所加以總章霧闢重屋煙披
懸晦日於梅梁掛晴虹於桂棟是以用斯珪璧奠彼牲牢

唱孤竹之簫管奏空桑之琴瑟爰於祔享之日乃至禋宗
之辰景色殊常煙雲冠古或凱風南至縈喜氣而分輝或
驟雨東來引祥雲而合嚮固可以作樂崇德殷薦上帝而
碧海遙澄覺三邊之霧捲丹霄上廓看九野之塵清祖宗
之靈貺昭然宇宙之神心可見虔誠旣展盛禮斯宏宜覃
作解之恩以廣奉先之德但赦者小利而大害始泰而終
否著小人之幸非君子之幸今歲已來頻敷渥命徒長僥
倖愈犯憲章非所以宏獎風猷發揮名教深慮無知者因
茲獲罪有識者緣此致譏遐思管仲之篇緬想吳漢之說

恐負丕構慨然長想昔孔明相蜀王猛佐秦咸以數赦爲言俱稱肆眚非便朕惟新闡政方事澄源期望古而裁規具修今而布澤伏以禮申崇祔情展泰禋式流曠蕩之恩兼明懲勸之道可大赦維州境內天下諸州見禁囚徒罪應致死者特宜免死配流者入徒餘並原宥京文武三品以上賜爵一級四品以上各加一階外文武官九品以上賜爵一轉皇親嗣王仍特許佩金魚袋內外職事官三品以上及四品清官並中書門下五品官父已亡者並量加追贈自宏道以前經任相三年以上及秦府晉府僚佐四

品以上並食實封功臣雖經罪責不至破家子孫無任京
官者特宜優與一官英府周府舊寮五品以上子孫亦宜
準此天下百姓爲父後者各賜右爵一級大酺三日

加相王實封制

鸞臺尊王子弟分裂山河式優征賦永固藩屏并州牧左
衛大將軍太子左千牛衛率兼安北大都護相王旦地惟
茂親躬此明德性安卑薄誠切沖讓頃以所食相州願入
天府章表懇到至於再三朕難違固請曲成美志然以王
國所費觸類宏多漢晉已來寵錫彌盛或食邑五萬戶或

連城數十里豈可遂其攬分之情忘其推恩之典宜於相
州加實封一萬戶進號安國相王主者施行

加太平公主實封制

鸞臺睦親之序誠有節而難踰寢善之方諒無和而不洽
太平公主延祥紫極稟慶彤闈月至漸宮下金娥而毓照
星分漢渚迴寶婺以凝姿踐素依仁更緝柔閑之範聞詩
蹈禮還表婉順之容毓悟發於天機聰明協於神授所以
特鍾先愛偏荷聖慈動輒承恩言必中旨故秦臺下鳳禮
越於常儀魯館乘龍榮該於美選自蜚軒即路蛩巖閱寢

途遙千里時亢九炎攀從莫由荒號孰寄公主親承委屬
代申悲苦涉履山川念徒行而彌切奠奉明夕哀獨薦而
逾勤宮務畢脩闡容胥備中外咸允情理兼極朕以其雖
有殊效蓋是恒途而凡典樞機固事奏請豈可以私親之
嫌累夫公道之分宜增湯沐之榮以表肅雍之譽可加實
封五千戶進號鎮國公主

封壽昌縣主制

鸞臺相王旦長女第三女第四女等毓靈河漢稟訓天人
蕙問清淑蘭儀婉順徽章所披抑有珎闕之封式開湯沐

之邑長女可封壽昌縣主第三女可封淮陽縣主第四女可封壽光縣主

封永年縣主制

鸞臺某王某第幾女疏芳桂苑發艷椒庭繡衽初笄已觀於婉淑瑤筐載弄更表於柔閑韶容將寶婺分暉惠質與瓊娥比秀承規蹈禮既漸訓於河洲延賞推恩宜加榮於湯沐可封永年縣主

封仙源縣主制

鸞臺相王第五女資靈桂魄稟訓蘭宮六行昭宣四德淳

備天桃穠李旣挺淑令之姿紅綬青綬宜開湯沐之邑可
封仙源縣主

贈徐有功越州都督制

忠正之臣自昔攸尚褒贈之典舊章所重故贈大理卿徐
有功節操貞勁器懷亮直洵古人之志業實一代之賢良
司彼刑書深存敬慎周興來俊臣等性惟殘酷務在誅夷
不順其情立加誣害有功卓然守法雖死不移無屈撓之
心有忠烈之議當其執斷並遇平反定國釋之何以加此
朕惟新庶政追想前跡其人旣沒其德可稱追往贈終慰

茲泉壤可贈越州都督仍遣使就家弔祭賜物百段授一子官

封五王制

門下建侯之典豈獨於懿親茅土之榮必覃於茂績侍中上柱國齊國公敬暉侍中上柱國譙郡開國公桓彥範銀青光祿大夫守中書令兼修國史上柱國漢陽郡開國公張柬之銀青光祿大夫中書令博陵郡開國公崔元暉中書令兼檢校安國相王府長史上柱國南陽郡開國公袁恕已等早竭忠讜夙罄腹心在身喻於股肱在物均於舟

楫除兇而殄逆更安社稷之基策命而褒崇爰申建侯之寵敬暉可封爲平陽郡王彥範可封爲扶陽郡王仍賜姓韋東之可封爲漢陽郡王兼特進勲及食實封各如故元暉可封爲博陵郡王恕已可封爲南陽郡王仍令準例朔望朝參便即不須推讓主者施行

遣十使巡察風俗制

古之御天下者以大寶爲公器以崇高爲外物仰則乾行順性命之理俯思坤載成博厚之德將以財成至道保邦靜人用清三微以齊七政能臻夫此者豈一人之力哉實

賴羣方共康庶績自季葉淪替佞棄公道官匪其人教無
所習懷才修潔者則依違以自容通方宏偉者則放蕩以
求利繇是淳化日消澆風歲長典章訛弊眚俗凋殘逶迤
陵頽莫能振理朕以薄德丕承寶命夙夜惟寅憂勞無怠
昧旦端冕心被寰瀛日晏罷朝念周黎庶頃者勵精推擇
傍求牧宰冀聞善政惠康乃乂虛已勵勤美化猶怠貪官
傲吏屢黷於爰書失職流亡幾淪於版籍豈刑賞之柄不
協其中將仁恩之誠未孚於下永言國本良深軫悼古者
天子巡狩省方觀俗而錫鑒備駕或以爲煩故分命輶軒

博採謠頌將以彰善癉惡激濁揚清散皇明以燭幽揚仁風以被物實資令德允屬通才惟懷永圖式鑒成憲宜於左右臺及內外五品以上官識理通明立性堅白無所詘撓志在澄清者二十人分爲十道巡察使二周年一替以廉按州部俾其董正羣吏觀撫兆人議獄緩刑扶危拯滯若能抗辭直筆不憚權豪仁恕爲懷黜陟咸當別加獎擢優以名器如脂韋苟全籛篠咸施高下在心顧望依附者將遷削屏棄肅以憲章咸竭乃心以副朕意

揀擇郡守制

共理天下者在良二千石宜令中書門下於內外揀擇必
取材望兼優公清特著可以宣風導俗具以名聞

拜南郊制

門下朕聞展禮禘祖昊穹著其成命就陰即陽墳典明其
大節故豺獮有祭下不隔於微品犧牲畢陳上以光於嚴
配軒皇用事則雍旁五祠漢帝潔齊則城南七里用能使
敬而不黷求而不匱祈穀則九載可登焚柴則三載無闕
是知上靈大德不私於亭毒之仁正直聰明有感於馨香
之薦瞻高欲語無易茲道我高祖神堯皇帝開階立極配

永循機太宗文武聖皇帝仗金策而清四方運璇璣而齊
七政高宗天皇大帝與乾坤合其德與日月合其明則天
大聖皇后建補天立極之功受河圖洛書之統五精歸運
四葉重光朕虔順樂推欽承騰命紹宏基於累聖日慎斯
兢執大象於羣生夙興加勵遠人殊俗占風而集蠻貊美
瑞休符繫月而輝史筆故得三邊靜柝五兵銷刃寰宇大
寧人神式序而德慙被物誠謝動天水旱尚臻陰陽猶舛
永以憂懼無忘鑒寐然則事天事地莫盛乎禋祀弗躬弗
親孰申乎誠敬朕自臨四海於今五年幸承祧社之靈未

展郊丘之謁方今朝風候律南至登辰乘上日而恭饗奉
高禋而肅事揚宗祖之休命酌壇場之令典百神受職三
才合契備殷薦之容行昭報之禮豈惟靈光所燭但驗其
徵方冀後先不違實受其福至若五刑之屬十惡爲重自
頃恩赦罕聞該及朕以眇身膺乎大寶下人不足每切如
子之傷上帝所臨敢逃在予之責間居三月未弭厥憊靜
念終朝載增寅畏侑神伊始與物維新用宏曠蕩之恩以
答高明之貺可大赦天下

金城公主出降吐蕃制

聖人布化用百姓爲心王者垂仁以八荒無外故能光宅遐邇財成品物繇是隆周理厯啓柔遠之圖強漢乘時建和親之義斯蓋御寓長策經邦茂範朕受命上靈克纂洪業總三才而統極混六合以爲家聲教所覃建木棗林之外提封爰亘弱水流沙之表悠然至道高詠薰風載戢干戈大張禮樂庶幾前烈克致和平睠彼吐蕃僻在西服皇運之始早申朝貢太宗文武聖皇帝德侔覆載情深億兆思偃兵甲遂通姻好數十年間一方清淨自文成公主往嫁其國因多變革我之邊隅亟興師旅彼之蕃落頗聞彫

弊頃者贊普及祖母可敦酋長等屢披誠款積有歲時思
託舊親請崇姻好金城公主朕之少女長自宮闈言適遠
方豈不鍾念但朕爲人父母志恤黎元若允誠祈更敦和
好則邊土寧晏兵役休息遂割深慈爲國大計受築外館
聿膺嘉禮彼吐蕃贊普即以今月二十七日進發朕親自
送於郊外

答張說讓起復黃門侍郎制

卿操烈寒松心橫勁草累遷臺閣咸播聲猷不屈二兇之
威獨全一至之節每念嘉歎無忘寢興但青瑣位隆黃樞

寄切爰奪苴麻之禮擢居審省之曹朝命已行即宜斷哀
贈拓跋思泰特進制

念功之典書有明訓贈終之數禮著彝式党項大首領故
右監門衛將軍員外置同正員使持節達洮等一十二州
諸軍事兼靜邊州都督仍充防禦部落使拓跋思泰頃者
戎醜違命爰從討襲躬親矢石奮其忠勇方申翦馘之勲
俄軫喪元之痛壯節彌亮美名可嘉宜崇寵章俾慰泉壤
可贈特進兼左金吾衛大將軍賜物五百段米粟五百石
仍以其子守寂襲其官爵

封長寧公主等制

門下

闕

宿揚輝爰稱嫠女絳河分彩是曰天孫柔德所資

乃生淑媛長寧公主等孕靈圓魄稟粹方儀載極幽閒用
光婉順皇基再造景命維新凡在懿親咸申禮命肅雍之
地未展徽章宜正此銀宮署茲金榜並開湯沐廣宣朝慶
可依前件

長寧公主下嫁楊慎交制

駙馬都尉楊慎交分榮戚里藉寵公門恭肅著於立身恪
勤効於從政鳳凰樓上宛符琴瑟之歡烏鵲橋前載協松

蘿之契宜覃茅土式廣山河

相王及太平公主不得拜諸王公主制

君臣朝序貴賤之禮斯殊兄弟天倫先後之儀亦異聖人之制率繇斯道朕臨茲寶極位在崇高負展當陽雖受宗枝之敬退朝私謁仍用家人之禮近代以來罕遵軌度王及公主曲致私情姑叔之尊拜於子姪違法背禮情用惻然自今已後宜從革弊安國相王及鎮國太平公主更不得輒拜衛王重俊兄弟及長寧公主姊妹等宜告宗屬知朕意焉

加長寧安樂公主實封制

門下長寧公主安樂公主等金波毓彩寶婺凝輝蘊詩禮
於心臺暢柔明於性府肅雍成德婉婉居懷非弄玉之能
方豈修瑤之是美特荷掌中之愛尤鍾膝下之慈宜錫寵
榮再崇湯沐可更加食實封一千戶通前滿二千戶

贈李昭德左御史大夫制

故李昭德勤恪在公強直自達立朝正色不吐剛以茹柔
當軸厲詞必抗情以歷詆墮府寺樹勲良多變更規模
歿而不朽道淪福善業虧嫉惡名級不追風流將沫式旌

壤樹光被幽明可贈左御史大夫

禁進獻奇巧制

朕凝懷紫宙滌想丹闕考千古之澆淳稽百王之治亂蒿
宮茅柱實興國之清猷玉席珠衣乃危邦之弊化朕自承
天纂運佩日披圖希齊轂飲之年願躡鵷居之代漢文提
烏少小留心晉武焚裘生平措意頃爲皇符肇建寶廟初
登眷彼王公多爲進奉莫不龍歌令節蛟食芳辰椒花獻
頌之時菊蘂浮觴之日或雕金鏤玉採六合之珍奇或翦
翠裁紅飾三春之草樹上行延納下務徵求鄺開紛紜公

金史卷一百一十二
三
私逼迫昇平欲濟蠹害非輕言念於茲深無所謂即宜懲
革勿至因循

授李承嘉戶部尚書制

門下紫極八座非德勿居丹屏六曹惟賢是擇金紫光祿
大夫李承嘉靈襟岐嶷識宇嚴明早聞通德之名夙有大
臣之望雄才逐日共騏驥而齊驅迅翼搏風與鷁鴻而並
翥柏臺憲府高膺弄印之榮芝甸神州獨著題輿之任堅
同白玉直若朱繩臺閣風生權豪氣懾洪材可重茂秩須
崇宜加曳履之班式獎從橋之對

授楊再思檢校左臺大夫制

避車要秩非德靡升專席雄班惟賢是屬侍中楊再思衣冠舊齒廊廟宏才寒暑不易其心始終弗虧其度在明時而有立居暗室以無欺投水陳謨邁漢朝之三傑霑沙作相掩虞日之五臣森乎抱松柏之心凜乎貫冰霜之氣佇因獻替兼肅權豪宜分務於鸞局俾効能於鳥署

授韋嗣立黃門侍郎制

絳衣近侍秩亞貂蟬青瑣崇班職參鸞鷟實神化之有寄信賢才之攸重通議大夫韋嗣立忠規奕葉孝緒蟬聯家

匡元鷺之朝人輔彤雲之代芝蘭並秀見謝砌之階庭麒
麟齊驅有劉山之昆季入光振鷺譽滿三臺出據憑熊聲
流十部近者命茲鷺渚已擢鴈行纔出芸局奄歸蒿里永
言荆樹坐折連枝眷彼恒山空餘一鳥俾遷榮於阜蓋宜
襲寵於黃樞

授張錫工部尚書制

明光畫省務總樞要建禮仙門職惟喉舌尚書左丞張錫
白虹良寶紫電雄鋒家傳鵲印之祥世襲貂冠之緒文適
吐鳳思縟騰蛟質映南金材逾東箭自提綱左轄執簡中

臺奏郭奕而無慙射崔洪而不愧紫樞佇俊彤管須賢宜
升賜劔之榮式表委珠之潔

慮囚制

禮防君子自昔通規律禁小人由來共貫朕情存革務志
在懲愆欲申作解之恩慮開僥倖之路非所以納人軌物
垂裕後昆既屬陽和之辰宜敦耕稼之業三農啓候方陳
敬愛之規百姓爲心爰軫泣辜之念將申慮降再釋狴牢
庶無滯禁之冤仍示小懲之誠其都城之內見禁囚徒朕
特親慮令所司具爲條例聞奏

授蘇珣左臺大夫制

烏臺峻秩望總鐵冠蒼佩崇班威高石室誠副相之榮級
實次卿之通任前岐州蘇珣詞吞楚澤量湛黃陂旣光大
厦之材堪入巨川之用西京展驥道掩題輿右輔憑熊風
超露冕朱帷霧撤初停州縣之勞白簡霜凝宜屏權豪之
氣

封張仁愿韓國公制

朕聞將帥興功本期於邦國帝王懸賞用答於疇庸持節
朔方道大總管右屯衛大將軍張仁愿器宇端雅風神秀

傑謀韜玉帳寄重金壇故得累司文武歷參邊鎮薊州作
牧旣紓東顧之憂榆塞總兵方釋北垂之慮而乃躬先士
卒負土築城橫却月於天街劃長雲於地脈宜列河山之
賞式崇帶礪之榮進封韓國公賜物三百段及衣裳一副

邵王贈皇太子制

門下悼往興哀事極於理義飾終追遠禮著於經國故邵
王重潤漸履雲霄分輝日月體謙恭之質蘊忠順之誠愛
敬盡於宮闈仁孝聞於區寓地居長嫡允膺崇樹天不憖
留奄隨運往朕丕膺寶命廼眷承祧瞰朱邸而無從儔青

方而結欵宜加贈典正位元儲可贈皇太子所司備禮改葬主者施行

集學生制

門下朕聞古之教者家有塾黨有庠術有序國有學蓋立訓之基也故上務之則敦本下由之則成俗豈可使顓門殆絕或乖其義入室將廢莫知其道乎朕承百王之末接千歲之統虚心問政早朝晏罷勵精求古忘寢與食思所以奉前聖之典謨矯茲深弊致後生於軌物遵我大猷去歲京畿不稔倉廩未實爰命樂羣暫停課藝遂令子音罔

嗣吾道空歸居無濟濟之業行有憧憧之歎雖日月以冀而歲時迭往今者逋治疑嘗麥且周於黎獻永言釋菜寧缺於生徒每用惕然良非所謂其國子監學生等麥熟後並宜追集務盡師資諸州牧宰亦倍加導誘先勤學教必使俊造無濫名實有歸庶博士弟子京邑由斯日就鴻生鉅儒海內爲之風化有司可卽詳下稱朕意焉主者施行

起復上官氏爲婕妤制

門下易著鳴謙禮稱辭貴以崇讓而退滿推心自得其道彌光前昭容上官氏相門積善儒宗雅訓文學冠時柔嘉

順則內守恬淡外防奢侈發於少長持以周旋樂無靡嫚
衣必澣濯珠璣不珍墳籍爲寶故能誠切一室功宣兩朝
讜議日聞屢援楚筆忠規歲納方輕漢輦惟此邦媛鬱爲
宮師遂能德綜十倫孝高百行頃罹創巨爰命權奪秩茂
左嬪思被光寵志齊班女懇陳撝挹而賢明之業經濟之
才素風逾邁清輝益遠不成厥美將蔽斯言今依表奏以
憲圖史可起復婕妤主者施行

贈王遠知金紫光祿大夫天詔

門下子喬羽化或畱連於故祠康成道存尚延佇於舊邑

矧夫跡膺仙錄名偶聖朝追想遺塵載殷遠念故玉清觀
道士贈太中大夫昇真先生王遠知性與道合神從化游
初窮帝解之微自得天倪之理時厯三代韞祕術以韜光
年逾十紀屬睿圖之啓運藏往知來察幽鑒遠亟符先渥
緬惟贈卹之恩聿申後命宜峻褒崇之禮可贈金紫光祿
大夫昇元先生餘如故主者施行

徵武攸緒詔

朕聞大隱忘情不去朝市至人無迹何所凝滯王高標峻
尚雅操孤貞有咸一之用宏體二之德學究深遠理詣精

微草芥貂蟬錙銖纓紱蔭松山而辭竹苑去朱邱而就清
溪逍遙林壑傲睨箕頰有年歲矣朕虔膺聖鑑重闡皇基
保乂邦家輯寧區宇求賢採彥俯谷窺山王之所居接近
嵩岳長望高烈思滿風煙將令移蹕具茨追尋大隗鳴鑾
峒岫詢問廣成機務殷繁有懷莫遂今遣國子司業杜愼
盈以禮命徵辟掃夔龍之第虛稷契之筵神化丹青朕之
志也豈以黃屋之貴傾彼白雲之心通變之宜希從降志
延佇閭闔若在汾陽

崇獎王友貞詔

敦夷齊之行可以激貪尚顏閔之道用能勸俗新除太子
中舍人王友貞德義泉藪人倫茂異孝愛始於事親忠信
表於行已富有文史廉於財貨久厯官常累聞課績有古
人之風保君子之德乃抗志塵外棲情物表深歸解脫之
門誓守薰修之戒頃如徵命作護儲闡固在辭榮累陳情
懇堅持淨義不登於車服惟悅於禪絢味靡求於珍饌朕
方崇獎廉退懲抑澆浮雖思廊廟之賢豈違山林之願宜
加優秩仍遂雅懷可太子中舍人員外置給全祿以畢其
身任其在家修道仍令所在州縣存問四時送祿至其住

所

東光縣主事跡編入國史詔

故紀王女東光縣主忠性純孝雅操貞烈感興運之方啓
痛亡靈之不追休戚是同悲喜交集發言鯁塞因致殂謝
聞之傷惋震於予懷忠孝之情深可嘉尚宜命史官編入
國史

追贈楊初成官詔

號州人故楊初成往者運屬殷憂志懷忠謹將迎六飛之
駕奄罹五刑之罰身旣伏誅家又從坐言念誠節深可哀

矜宜有褒榮式旌忠順可贈左騎衛左一府郎將

令張柬之母辭封爵詔

卿履謹尚遜忌盈戒滿詞志勤勤請謝王位然懸爵所以
勸善申至公也裂土所以疇庸非徇私也故漢德之盛異
姓而王者八人魏祚之隆同功而邑者千戶今卿列爵之
貴未越於漢圖食邑之豐纔半於魏制而遽形簡牘一何
甚也朕承三代之丕業荷七廟之威靈惟唐據承祧之尊
於周保元良之重至於復予休命配天大業雖厯數有歸
亦謳歌所繼然狐鼠不掘終貽城社之憂頑兇未除實負

朝廷之懼卿誠亮白日忠勵秋霜懷直道以立身固一心而徇國自二兇構患潛圖不軌惡跡初彰釁萌始露卿之大節義在不虧烈士之首期於必碎及難作宮禁禍生肘腋卿上銜天命外發兵符行正卯之戮旣於兩觀磔蚩尤之屍俄成四豕曾不延晷鬱成大功分壤錫珪固其宜矣行當勉以自愛享此眉壽乘几杖之榮極鄉園之樂崇讓小節念勿爲也

貶敬暉等詔

則天大聖皇后往以憂勞不豫兇豎弄權暉等因興甲兵

剗除妖孽朕錄其勞效備極寵榮自謂勲高一時遂欲權
傾四海擅作威福輕侮國章悖道棄義莫斯之甚然收其
薄効猶爲隱忍錫其郡王之重優以特進之榮不謂谿壑
之志殊難盈滿旣失大權多懷怨望乃與王同皎窺覘內
禁潛相謀結更欲稱兵絳闕圖廢椒宮險迹醜詞驚視駭
聽屬以帝圖伊始務靜狴牢所以久爲含容未能暴諸遐
邇自同皎伏法釁跡彌彰儻若無其發明何以懲茲悖亂
迹其巨逆合寘嚴誅緣其昔立微功所以特從寬宥咸宜
貶降出佐遐藩暉可崖州司馬東之可新州司馬恕已可

寶州司馬元暉可白州司馬並員外置

賞郭山惲詔

郭山惲業優經史識綜古今八索九邱由來遍覽前言往
行實所該詳昨者因有豫遊式延朝彥旣乘歡洽咸使詠
歌遂能志在輔時雅申諷諭謇謇之誠爾切諤諤之志愈
明宜有褒揚美茲鯁直可錫時服一副

褒天竺國使臣詔

中天竺國大首領大野迷地羅梵摩等殊邦慕德重譯來
朝是加褒獎用益誠心可果毅都尉賜緋袍銀帶放還蕃

勞契丹李失活詔

卿等累覃邦化多厯年所城池郡邑冠蓋相望往緣邊牧
非人遂令卿等失業念彼雄藩鞠爲茂草今卿等削摧異
俗歸誠本朝頻獻封章益明忠款克復州鎮宛如平昔失
活將尚公主永爲藩臣入拜闕庭良深慰喜卿等涉路遠
來得平安好否近屬節假不得早與卿等相見且向曹司
安置待後進止

追奪劉光業等官爵詔

國之大綱惟刑與政刑之不中其政乃虧劉光業王德壽

王處貞屈貞筠鮑思恭劉景陽等庸流賤職茲吏險夫以
麤暴爲能官以凶殘爲奉法往從按察害虐在心倏忽加
刑呼吸就戮暴骨流血其數甚多冤濫之聲盈於海內朕
惟新布澤恩被人祇撫事長懷尤深惻隱光業等五人積
惡成釁並謝生涯雖其人已殂而其跡可貶所有官爵並
宜追奪其枉被殺人各令州縣以禮埋葬還其官蔭劉景
陽身今見在情不可矜特以會恩免其嚴罰宜從貶降以
雪冤情可棣州樂單縣員外尉自今內外法官各宜敬慎
其文深刺骨跡徇凝脂高下任情輕重隨意必置嚴典以

彰輝惡其酷吏邱神勣來子珣萬國俊周興來俊臣魚承
煜王景昭索元禮傅遊藝王宏義張知默裴籍焦仁亶侯
思立郭霸李仁敬皇甫文備陳嘉言等其人已死其垂拱
已來枉濫殺人有官者並令削奪唐奉一依前配流李秦
授曹仁哲並與嶺南惡處

追復李勣官爵詔

故司空勣往因敬業毀廢墳塋朕追想元勲永懷佐命昔
竇憲干紀無累安豐之祠霍禹亂常猶全博陸之祀罪不
相及國之通典宜特垂恩禮令所司速爲起墳所有官爵

並宜追復

欽定全唐文卷十七目錄

中宗 二

送魏元忠歸鄉勅

宴集日本國使臣勅

停親謁乾陵勅

賜王峻勅

禁化胡經勅

答張景源請改中興寺勅

賜崔琬彈宗楚客密狀勅

賜成王千里衣物勅

答大恒道觀主桓道彥等表勅

答敬暉請削武氏王爵表勅

令入學行束脩禮勅

褒盧正道勅

冊張柬之漢陽郡王文

冊崔元暉博陵郡王文

冊崔元暉妻爲博陵郡王妃文

冊贈楊再思并州大都督文

冊贈豆盧欽望司空并州大都督文

即位赦文

高宗天皇大帝謚議

報薛元超書

賜突厥書

召曹溪惠能入京御札

三藏聖教序

九日登高詩序

林光宮道岸法師像讚

賢首國師真讚

欽定全唐文卷十七

中宗二

送魏元忠歸鄉勅

臨歧感愴深惻朕懷勉愼行鑣佇足還轡但正直之士爲
邪佞所憎慮有不逞之徒知卿在路無備因茲射險忽肆
兇狂萬一損卿追悔無及縱加鼎鑊何補於卿朕心口爲
憂明發不寐今故遣千騎四人緩急任卿驅使

宴集日本國使臣勅

日本國遠在海外遣使來朝旣涉滄波兼獻方物其使眞

人莫問等宜以今月十六日於中書宴集

停親謁乾陵勅

勅昔有獻高寢禮遵於仲月將上原陵昏達於中夜所以
銜悲罔極申敬如在鑒於前史抑有舊章朕以寡昧早罹
酷罰屬遠安邇肅慶承於七廟霜來露往感積於四時頃
迴旆洛師停輿京邑蓋非省風俗希先王褒后之言伏以
瞻山園奉聖人因親之教有司已具成命必行渭北衣冠
預嚴於法駕陵東松柏傍蔭於清道先陳翼翼之詩後展
蒸蒸之慕孟冬屆序計日數程義在因心不忘寢寐但以

近郊井隧有時水旱賦於納秸未瞻圭田取彼盈箱曾徵
寶臬而公卿常自獻書立議咸以爲明察敬事撫臨愛育
若萬乘不備其禮固非敬也百姓不勝其勞故非愛也況
駿奔執豆夙夜於象居攀戀遺弓載勤於奉邑以眇身之
兼願殊先志之恤隱是則乖於濟物咎必在予所不忍言
諒非獲已俯順衆情逾增遠思前以今年十一月二十日
親謁乾陵者且停

賜王駿勅

彼州往緣寇盜戶口凋殘委任失材乃令至此卿處事強

金史卷之二十一
濟遠邇寧靜築城務農利益已廣樨栝綏輯復業者多宜
須政成安此黎庶況百姓又有表請不須來也

禁化胡經勅

朕叨居寶位惟新闡政再安宗社展恭禋之大禮降雷雨
之鴻恩爰及緇黃兼申懲勸如聞天下諸道觀皆畫化胡
成佛變相僧寺亦畫元元之形兩教尊容二俱不可勅到
後限十日內並須除毀若故留仰當處官吏科違勅罪其
化胡經累朝明勅禁斷近知在外仍頗流行自今後其諸
部化胡經及諸記錄有化胡事並宜除削若有蓄者準勅

科罪

答張景源請改中興寺勅

朕承天宰物光宅中區嗣祖宗之丕基承聖善之洪業嚮
明負展實奉成規往自永淳至於天授奸臣稱亂鼎運不
安則天大聖皇后思顧託之隆審變通之數忘已濟物從
權御宇四海繇其率順萬姓所以咸寧唐周之號暫殊社
稷之祚斯永天保定爾實繇於茲朕所以撫璇璣握金鏡
事惟繼體義即續戎其若文叔之起春陵少康之因陶正
中興之號理異於茲宜革前非以歸事實自今已後更不

得言中興其天下大唐中興寺觀宜改爲龍興寺觀諸如此例並即令改

賜崔琬彈宗楚客密狀勅

卿列霜簡忠在觸邪遂能不懼權豪便有彈射眷言稱職深領乃誠然楚客等大臣須存禮度朕識卿姓名知卿鯁直但守至公勿有迴避

賜成王千里衣物勅

晝巡周衛夜警巖廊旣曰爪牙實稱心腹左金吾衛大將軍成王千里聲高沛獻德邁二南以磐石之崇班當執金

之重寄察奸無對討猾若神固以威動千廬勤宣五校近者衙仗之內輒有詐僞之人曾不斯須遽令擒獲能官之目久已馳芳稱職之名從茲著號可賜衣一副兼賜物一百段

答大恒道觀主桓道彥等表勅

朕以匪躬忝承丕業雖撫寧多失而平恕實專矧夫三聖重光元元統序豈忘老教偏意釋宗朕志款還淳情存去僞理乖事舛者雖在親而亦除義符名當者雖有怨而必錄頃以萬幾餘暇略尋三教之文至於道德二篇妙絕希

夷之境天竺有空二諦理祕真如之談莫不敷暢元門闡
揚至蹟何假化胡之僞方盛老君之宗義有差違文無典
故成佛則四人不同論弟子則多聞舛互尹喜旣稱成佛
已甚憑虛復云化作阿難更成烏合鬼谷北郭之輩未踐
中天舍利文殊之倫妄彰東土胡漢交雜年代亦乖履冰
而說涅槃曾無典據蹈火而談妙法有類俳優誣詐自彰
寧煩縷說經非老君所制毀之則匪曰孝虧文是鄙人所
談除之則更彰先德來言雖切理實未安宜悉朕懷即斷
來表

答敬暉請削武氏王爵表勅

朕嘗因暇景博覽前修帝籍皇圖略稽其迹至若二靈肇
判三才聿興驪連栗陸之辰尊盧大庭之日時猶朴略未
著圖書洎乎出震應期畫八卦而成象炎皇御歷播百穀
以興農車服創於軒轅之朝歷象建於唐堯之代封建之
事闕爾無聞自周漢已來方崇藩屏至於三微更王五運
迭興以古揆今事迹有爽比者別宗撫歷異姓興邦伏以
則天大聖皇帝內輔外臨將五十載在朕躬則爲慈母於
士庶即是明君往者垂拱之中嗣皇臨政當此之際魯衛

並存及乎全節興妖琅琊構逆災連七國釁結三監既行
大義之懷遂有泣誅之事周唐革命蓋爲從權子姪封王
國之常典卿等表云天授之際武家封建唐家藩屏豈得
並封者至如千里一房不預逆謀還依姓李無改舊惠豈
非善惡區分申明逆順矣今以聖上乖豫高枕怡神委政
朕躬纂承丕緒昨者二月之首攸暨等屢請削封朕獨斷
襟懷不依來請昔漢祖以布衣取天下猶封異姓爲王況
朕以累聖開基豈可削封外族羣公等以天無二日土無
二王抗表紫庭用申丹懇者然以賞罰之典經國大綱攸

暨三思皆悉預告凶豎雖不親冒白刃而亦早獻丹誠今若卻除舊封更慮有功難勸

令入學行束脩禮勅

學生在學各以長幼爲序初入學皆行束脩之禮禮於師國子太學各絹三匹四門學絹二匹俊士及律書算學州縣各絹一匹皆有酒脯其束脩三分入博士二分助教又每年國子監所管學生國子監試州縣學生當州縣並選藝業優長者爲試官監試

褒盧正道勅

欽定全唐文

卷十七

中宗

皇帝問洛州滎陽縣令盧正道卿才行早著清白有聞夙
夜在公課最居首使車昇獎朕甚嘉之今贈卿祿秩以褒
善政勲勗終始無替嘉聲

冊張柬之漢陽郡王文

維神龍元年歲次乙巳五月己卯朔十五日癸巳皇帝若
曰咨古者之命官也有德尊以爵有功尊以祿用能百揆
時序庶績其凝詳其利建之跡也異姓則鬻熊封之於楚
宗子則召奭宅之於燕惟皇作極率由前典咨爾銀青光
祿大夫中書令監修國史漢陽郡王張柬之効祉星辰資

靈川嶽負佐時之略有經邦之材以忠孝爲己任以仁義爲事業頃者巨猾未殄常思克清一朝奮臂二兇行翦竟燃臍於東市終掛膽於西州遂得聖祚中興皇運光啟乾坤再闢日月重明刑白馬而書功未足云答指青山之比礪曾何足酬是用命爾爲特進漢陽郡王爾其靖共乃職咸允具瞻使厚秩尊官永全於長代春蘭秋菊無絕於終古往欽哉可不勉歟可不慎歟

冊崔元暉博陵郡王文

維神龍元年歲次乙巳六月己酉朔六日甲寅皇帝若曰

咨德懋懋官功懋懋賞萬古常行之則千載不刊之典故
五十一之啟漢三十一之中興或舉代趙如拾遺或取秦
隴如偃草結丹青之誓蒞白馬之盟祚土包茅與洪河而
永固分珪錫社共天壤以俱隆緬考舊章率由此道爾中
書令上柱國博陵郡王崔元暉夙負雄圖早懷英毅蘊公
輔之量有王佐之才頃者元兇構姦圖危社稷遂能懷忠
抱義奮不顧身重國輕生意全王室艱難旣濟國家永清
勤亦至矣功亦大矣昔賞及於鬻熊聿封於楚功尊於臧
紇乃建於燕異姓封王抑惟前典憲章故事庶載疇功是

用命爾爲博陵郡王用旌誠効宣其忠節松竹無渝往欽哉汝諧可不慎歟

冊崔元暉妻爲博陵郡王妃文

維神龍元年歲次乙巳六月己酉朔六日甲寅皇帝若曰咨夫母以子貴妻以夫榮聞諸通古列在方策惟爾博陵郡王崔元暉妻盧氏筮惟福允歸乃慶餘備嫺詩禮夙擅言辭斷織捐金道姆師之雅訓採蘋銘菊遵女史之明規向時王室艱難逆臣放命敬暉等忘家殉國翦暴除凶二曜重朗萬姓相歡爰命疇庸聿予茂賞大名隆器已錫於

所天徽號寵章宜覃於齊體今遣銀青光祿大夫行尚書
右丞上柱國蘇瓌副使通議大夫守太常少卿韋叔夏持
節賫冊於是命爾爲博陵郡王妃爾其無違藩守務於和
理而使家可長久聖人重之可不美歟敬之哉

冊贈楊再思并州大都督文

維景龍三年歲次己酉九月甲寅朔二十三日丙子應天
神龍皇帝若曰昔孔某云歿魯哀由其作誄晏嬰旣往齊
景爲之行哭且謂陪臣義由存此甫懷良相情則過之咨
爾故尚書右僕射同中書門下三品監修國史上柱國鄭

國公楊再思河嶽粹靈廟堂神器率由百行能具九德自
弼諧庶績師長羣寮清白所以樹風丹青所以成化有若
巫咸之保乂傳說之欽承故能宣慈惠和邁跡垂憲而運
同過隙悲深撫几興言軫悼載想謨猷發金縢之舊銘詢
韓亳之前訓俾加印綬秩齊於子真式奉園陵志畢於元
凱是用增寵命於端揆茂徽章於連帥今贈爾持節并州
大都督遣太府少卿韋璿持節備禮冊命方使五公門閥
二臣邱壠魂而有靈懿茲榮贈嗚呼哀哉

冊贈豆盧欽望司空并州大都督文

維景龍四年歲次庚戌二月

闕二字

朔二十二日應天神龍

皇帝若曰咨爾故開府儀同三司知軍國重事上柱國芮國公致仕豆盧欽望朕聞古之哲王必有賢佐其存也俾又謂之奮庸其歿也不朽謂之立德可不然與爾十紀羽儀三朝冠冕專直爲操非法不言溫謙在容非禮勿履故能揆路斯穆台阶以平而韋賢罷歸疏廣辭退致虛守靜方密道樞居常待終竟從冥錄是用輟朝增獻趨仰興懷榮以建旗正其服袞今贈司空并州大都督持節備禮冊命則二儀式奉九原可作冀爾魂魄嘉夫寵數嗚呼哀哉

即位赦文

門下聞天地盈虛四時有消息之度皇王興替五運有遷
革之期稱號斯殊驪駟亦異受明命者罔不由茲我大唐
高祖神堯皇帝聖期首出天與神器有大功於區夏有大
造於生靈太宗文武聖皇帝道則繼明業推構極類商湯
之起毫若姬發之承周彈壓九皇牢籠萬古高宗天皇大
帝上聖御圖大明司契手調元氣心運洪鑪齊五緯而平
太階應三神而登日觀網羅開闢包冠羲胥大猷備闡能
事斯畢仙駕不追逆臣開釁敬業挺災於淮甸務挺潛應

於沙場天柱將搖地維方撓非撥亂之神功不能定人之危矣則天大聖皇帝亶聰成德濬哲應期用初九之英謨開太一之宏略振玉鈐而殪封豕授金鉞而斬長鯨受河洛之圖書當昊羲之厯數惠育黎獻並登仁壽旣而凝懷問道屬想無爲以大寶爲勞生遂復忝於明辟且有後命俾承先緒光啟大唐之圖用崇興復之基交際在辰情深感慰奉高祖之宗廟遵太宗之社稷不失舊物實在於茲業旣惟新事宜更始可改大周爲唐社稷宗廟陵寢郊祀禮樂行運旗幟服色天地等字臺閣官名一事已上並依

永淳已前故事其神都依舊爲東都北都依舊爲并州大都督府永昌來庭兩縣並從廢省其百姓依舊分屬河南洛陽兩縣周朝宗廟陵寢及官宜令所司商量處分朕之遠系出自老君靈佑所資貽慶長久宜依舊上尊號爲元元皇帝省司差使冊告天下村落佛堂並令開門灑掃不得因茲聚斂創加修葺庠序之規風教之首京都兩學尚且闕修欲令四方何以取則其京都學館及先聖廟堂所有破壞未營造者逐要修葺速令畢功不得浪有勞擾樂府之設國風所繫豈惟易俗抑且和神至若絲竹繁聲倡

優雜伎深乖禮則並宜量事減省國之禮儀已經改撰隨時逐變務在宏通宜令禮官重加詳審於行事有不便者即從損益制勅刪定處分已久宜從易簡務速施行設官固須量才稱職比來委任稍亦乖方遂使鞠獄推囚不專法守撰文修史豈任祕書營造無取於將作勾勘罕從於比部多差別使又著判官在於本司便是曠位並須循名責實不得越守侵官皇家親屬籍沒者則天大聖皇帝雖已溥暢鴻恩其先有任五品以上官枉遭陷害者並宜改葬式遵典禮若有後嗣還其資蔭其別勅安置并左貶者

亦復其屬籍量還官爵仍遣諸流移人除犯贓賄及畜蠱
毒造僞避讎反逆緣坐勘會不免者餘並放還天下軍鎮
不要者多轉輸艱辛府庫虛耗事須改弊不可循常宜簡
內外官人有才識者分遣充使巡邊按覆須留鎮遏及應
減一事以上並委使人共所管詳度還日具利害聞奏其
應支兵先取當土及側近人仍隨地配割分州定數年滿
差替各出本州永爲格例不得踰越五品以上致仕曾伏
事先朝者賜爵一級曾任州府幕府及任洛州牧日官人
並勘責奏聞經任東宮官僚見任六品官計階應入五品

者特宜不拘年限餘依常例三衛細引主帥直司行署番
官七絕等通前各減二年勞考滿者各加勲一轉合得官
者稍與處分中書門下官人計階考入五品者優量令史
番官準羽林例處分分直省及外司官與二十二日誅賊
之時緣祇承在中書省者各賜勲一轉諸司有品直司宜
加一階無品直司賜勲一轉禮官緣即位修執儀注者各
賜物二十段正月當番三衛監門等於武成衙內明福門
外南衙及諸門者賜物十段左右羽林及東宮北門廚供
膳及匠準例各賜物二十段正月量追三衛細引監門細

引直長飛騎雜技飛騎各賜物十段東宮北門官及三衛
細引監門直長各賜物二十段仍類例功夫多少奏聞其
引玉冊及舉冊讀冊等官人各賜物五十段授冊使人賜
物一百段書冊人各賜物十段其舉腰舉官人賜物二十
段飛騎各賜物十五段其舉香燈三衛及舉寶人各賜物
二十段頃者戶口逃亡良田差科繁劇非軍國切要者並
量事停減若要和市和雇先依時價付錢自非省支勒索
不得輒有進送諸貢物皆須任土當處無者不得別求仍
於常數每事量減緣百姓間所有不穩便者並委府州具

狀奏聞朕當親覽即爲釐革天下百姓並免今年租及地稅自今以後租庸準符配定更不須徵折脚價錢其已前未徵得者亦即免放天下宗姓並準舊式房州百姓宜給復三年其諸司官員并雜色役掌幕士門役之徒兼音聲人丁匠等非灼然要籍並量事減省所司速爲條制廢馬數多皆須秣飼食人之粟日費滋深殿中諸閑廢馬量支留以外抽送外州馬坊及本監牧其東宮諸王公主等馬應官供者亦令隨事減省奢淫伎巧實爲蠹弊皆因節日宗屬婚親王公妃主競相賀遺或造珍麗妄爲進奉錦綵

異飾雕鏤奇文假撰樓臺僞裝禽獸諸如此類深是害時
宜明勅格嚴加禁斷衣服采章一準令式夫鄒纓齊服尚
且變俗移風朕率先百僚必期化成兆庶東都正月當上
番兵年至五十五即放出前赦及今制處分有不盡者並
令所司類例續奏布告遐邇咸使知聞主者施行

高宗天皇大帝謚議

竊聞星迴日薄懸象著明之謂天龍躍鳳翔握鏡乘時之
謂聖天以不言爲德非言無以暢其神聖以無名會道佇
名然後筌其用營窟槽巢之代猶昧典章如雲類海之君

方崇號謚所以闡揚功美榮鏡古今伏惟大行皇帝稟樞
電以降靈應星虹而延睿以大聖而乘聖克昌寶曆之基
由至德而纂德載廣金圖之運對日之歲窮象外之微言
弄田之辰盡天下之能事逮入膺儲副養德春闈恒侍禁
中問安之道斯極長居膝下候色之誠逾勵因心隆於愛
敬率性感於神明此先聖之孝德也洎乎正位旒扆光宅
區縣孚俗軫如傷之念負重懷若厲之心求瘼恤隱寒扇
渴漿追夏禹之焚甲襲殷湯之解網一物有違則滿堂興
慮一夫弗獲則推溝寘懷此先聖之仁德也無幽不察觀

六合於目前無遠不昭視八紘於掌內循機授政則旁燭
於九圍命將出師則坐知其萬里此先聖之明德也寅畏
上元肅雍清廟以義制事以禮制心提衡均馭朽之危履
石同蹈冰之懼雖處泰乘闕休而勿休此先聖之恭德也
卑宮菲食土簋茅檐身好弋綈之衣手無金玉之玩輦裘
必燼特袂安撤闕士星疑莫施劫於影而勿馭此先聖之
廣德也榮河綠錯授宸鑑而生知溫洛丹清澡璇襟於性
與汾水秋風之唱仰天翰而扶輪矯汭叢雲之歌欽睿詞
而擁篲此先聖之文德也以德敷化無遠而不懷以我伐

戎有征而必伏提封所亘拓地位於鄒瀛正朔所通闢境
踰於亥步此先聖之威德也關爲於無事鳴鑾訪道敬拜
小童之言修道就關載感大庭之夢此先聖之元德也體
至道而調一氣舒卷陰陽運沖和而契兩儀發揮風雨將
百靈以交際與萬物而通誠珍瑞普彰休徵畢應此先聖
之神德也以茲九德上則九元顧連陸於後塵掩胥燧而
高視若乃茂育羣方之惠財受貺於元符封嶽沒疑金復
推功於文疑帝巍巍蕩蕩無得而名方冀千祥翊聖萬瑞
讚德長居北極之尊永契南山之壽豈謂十枝墜景遽淪

懸晷之輝八柱傾天奄落閩陽之構雲輿在御仙路方遙
攀號無再奉之期摧殞深百年之痛鼎湖弓劒逾增日遠
之悲璇寢衣冠空愴月遊之感顧以虛菲夙承乾蔭旣忝
彰明之地常懷輔佐之誠薦螢燭以助光引鶴露而添海
而聖心虛受無來不應每聽覽餘暇侍奉誥言論道德則
洞啟元樞語忠孝則廣通心極敘軒頊之淳化積若神交
述堯禹之清風宛成晤對在位三十五載功超七十二君
傳象所莫傳開闢所不覩罄楚越之竹書善未窮極泉雲
之才頌德難盡自賢猷疑厭俗緹律亟移禍變相仍荒梗

彌切正惟憑几之夕爰及啟廡之際神情湛正顧託殷勤
痛道範之既遠懼先聖之無述所以偷延荒息強終彝倫
望霄漢以興摧瞻宸筵而永慕今者龜謀既襲蛩蟥將臨
敬上尊號之儀燕叶大名之典謹按自然覆育曰天明一
合道曰皇無所不包曰大謹狀上議曰天皇大帝廟稱高
宗

報薛元超書

昨奉嘉命廣開正路翳已燔矣褶亦去焉師傅之言實獲
我心

賜突厥書

皇帝敬問突厥可汗使人他滿達干至所言堅昆使來及吐蕃使不願入漢並奚契丹等俱知之朕於西夷亦信而已來無所拒去無所留可汗好心遠申委曲深知厚意今附銀胡瓶盤及雜綵七十匹至可領取

召曹溪惠能入京御札

朕請安秀二師宮中供養萬幾之暇每究一乘二師並推讓云南方有能禪師密受忍大師衣法可就彼問今遣内侍薛簡馳詔迎請願師慈念速赴上京

三藏聖教序

蓋聞蒼蒼者天列星辰而著象茫茫者地奠川嶽以成形
仰觀天文既如彼也俯循地理又若斯焉夫以妙旨幽微
名言之路攸絕真如湛寂性相之義都捐然則發啟心聳
資法雷之激響獎導迷衆俟覺首以司方故知假名不壞
於常名樂說乃詮於無說至若象外之象獨稱三界之尊
天中之天爰著六通之聖法王利見孕育於七十二君梵
帝乘時牢籠於萬八千歲周星閱彩言符誕降之徵漢日
流祥載叶通神之夢故能威揚沙劫化彼塵區玉毫舒耀

而除昏金口宏宣而遣滯破煩惱之賊詎藉干戈壞生死
之軍惟憑慧力闢圓明之界廣納於無邊開常樂之門普
該於有識縱使浮天欲浪境風息而俄澄漲日情塵法雨
霑而便廓歸依者銷殃而致福迴向者去危而獲安可謂
巍巍乎其有成功蕩蕩乎而無能名者矣但四生蠢蠢未
悟無常六趣悠悠俱纏有結詎知空華不實水月非堅馳
逐於五陰之中播遷於三界之域納諸品彙終俟法門自
白馬西來元言東被世尊則隨類敷演衆生乃逐性開迷
馬鳴擅美於瓊編龍樹騰芳於寶偈於是遙通震旦遠布

閻浮半滿之教區分大小之乘並驚澄安俊德接武於勝
場琳遠高人駢蹤於法宇遂使微言著範歷千古而暢英
聲至蹟流規周十方而騰茂實頃屬後周膺運大扇魔風
遂使天下招提咸從毀廢寰中法侶並混編氓嗟乎間寂
禪居空留宴坐之處荒涼慧苑無復經行之蹤爰洎開皇
重將修建旋逢大業又遇分崩鬼哭神吟山鳴海沸旣遭
塗炭寧有伽藍正法消淪邪魔增長於是人迷覺路遭迴
於苦集之區俗蔽真宗羈絆於蓋纏之內我大唐之有天
下也上凌巢燧俯視羲軒三聖重光萬邦一統威加有截

澤被無垠掩坤絡以還淳亘乾維而獻款再懸佛日重補
梵天龍宮將八柱齊安鷲嶺共五峯爭峻大宏釋教諒屬
皇朝者焉大福先寺翻經三藏法師義淨者范陽人也俗
姓張氏五代相韓之後三台仕晉之前朱紫分輝貂蟬合
彩高祖爲東齊郡守仁風遠扇甘雨隨車化闡六條政行
十部爰祖及父俱厭俗榮放曠一邱逍遙三徑含和體素
養志恬神摘芝秀於東山挹清流於南澗可謂尋幽丹嶠
棲偃白雲臯鶴於是吞聲場駒以之繫影法師幼挺明悟
夙彰聰敏纔踰辯李之歲心樂出家甫過遊洛之年志尋

西國業該經史學洞古今總三藏之元樞明一乘之奧義
旣而閒居習靜息慮安禪託彼山林遠茲塵累三十有七
方遂雅懷以咸亨二年行至廣府發蹤結契數乃十人鼓
擢昇航惟存一己巡南溟以遐逝指西域以長驅歷巖岫
之千重凌波濤之萬里漸屆天竺次至王城佛說法華靈
峯尚在如來成道聖躅仍留吠奢城中獻蓋之跡不泯給
孤園內布金之地猶存三道寶階居然目覩八大靈塔邈
矣親觀所經三十餘國凡歷二十餘載菩提樹下屢攀折
以淹留阿耨池邊幾濯纓而藻鑑法師慈悲作室忍辱爲

衣長齋則一食自資長坐則六時無倦又古來翻譯之著
莫不先出梵文後資漢譯摭詞方憑於學者銓義別稟於
僧徒今茲法師不如是矣旣閑五天竺語又詳二諦幽宗
譯義綴文咸由於已出措詞定理匪假於旁求超漢代之
摩騰跨秦年之羅什所將梵本經僅四百部合五十萬頌
金剛座真容一鋪舍利三百粒以證聖元年夏五月方屆
都焉則天大聖皇帝出震膺期乘乾握紀紹隆爲務宏濟
爲心爰命百寮兼整四衆虹幡撐日鳳吹遏雲香散六銖
華飄五色鏘鏘濟濟煒煒煌煌迎於上東之門置於授記

之寺共于闐三藏及大福先寺主沙門復禮西崇福寺主
法藏等翻華嚴經後至大福先寺與天竺三藏寶思未多
及授記寺主惠表沙門勝莊慈訓等譯根本部律其大德
等莫不四禪凝慮六度冥懷懸法鏡於心臺朗戒珠於性
海詞林挺秀將覺樹而聯芳慧炬揚輝澄桂輪而合影渾
金璞玉諒屬其人誠梵宇之棟梁實法門之龍象已翻諸
雜經律二百餘卷繕寫云畢尋並進內其餘戒律諸論方
俟後詮五篇之教俱明八法之因備曉鵝珠尚護蟲命無
傷浮囊必取於不虧油鉢終期於靡覆崇聖教之紀綱啟

含生之耳目伏願上資先聖長隆七廟之基下逮微躬恒
佐九天之命遷懷生於壽域致薄俗於淳源歲稔時和遠
安邇肅顧以萬幾務總四海事殷爰憑乙夜之餘式贊彌
天之德課虛扣寂聊題序云

九日登高詩序

粵以景龍三年賓鴻九月乘紫機之餘暇歷翠籞以寅遊
爾乃氣肅商郊風驚兌野波收元灞澄霽色於林塘雲歛
黃山藹晴暉於原隰銜蘆送響疑傳蘇武之書化草翻光
似臨車允之帙於時詔懿威命朝賢屬重陽之吉辰呈九

臯之嘉瑞萸房薦馥辟邪之術爰彰菊藥含芬延年之驩
攸著人以酒屬喜見覆於金杯文在茲乎盍各飛於玉藻
淵明抱菊且浮九醞之觀畢卓持螯須盡一生之興人題
四韻同賦五言其最後成罰之引滿

林光宮道岸法師像讚

戒珠皎潔慧流清淨身局五篇心融八定學綜真典觀通
實性維持法務綱統僧政律藏異今傳芳象教因乎光盛
賢首國師真讚

宿植明因專求正真庵園晦迹蓮界分身闡揚釋教拯濟

迷津常流一雨恒淨六塵辨圓方開言泉廣濬護持忍辱
勤修精進講集天華微符地震運斯法力殄茲魔陣爰標
十觀用契四禪普斷煩惱遐祛蓋纏心源鑒徹法鏡激懸
慧筏周運慈燈永傳名簡紫宸聲流紺域梵衆綱紀僧徒
楷則鎮洽四生曾無懈怠播美三千傳芳百億